



## O Volapükaf lens valöpo!

Memob gudiko, vio bü lunüp ästunob, posä inünömiolodob ti dabukis tel Volapüka (fa els ‚Charles Sprague‘ e ‚Ralph Midgley‘) ed iküpob disti gramatik ömik bepenotas et de od. No äkanob suemön, kelan lautanas bofik ipöлом, e nüns saidik ädefons bevüresodo ad kleilükön obe patis mödik Volapükajenotema. Sis ettim mödikos evotikon, e num fonätas veütik dö Volapük e jeno tem ona bleibon gretikumön bevüresodo. Enu resodatoped labü maters bukemas Nedänik efinükon notükami vobotas cifik fa el ‚Arie de Jong‘ püki obsik tefölas (ekö! ladet: <https://www.delpher.nl/nl/boeken/results?qql%5B%5D=%28creator+exact+%22Jong%2C+Arie+de%22%29&coll=boeken>).

Ye — ad stun levemik oba — dinäd bal no jinon votikön: mödikans igo no steifülons ad dibätükön nolis primik okas tefü Volapük dub dupadam u stud lebukas klatädik. Bü yels anik seman älesagon obe, das vödabuk mödapadik öbinon-la danaütik, ed öbinos-la frutikum ad mekön sukiani bevüresodik, medü kel alan vifo ökanon tuvön leigätodi Volapükavöda zesüdik. Süadob, das geb vödabuka kösömikum pro zeil ot frutonöv valanis vemikummo, bi pö küp fädik su pad paneodöl vödas votik ko stamäd ot seivoyöv mödikumosi dö defomamavöd: dil gramata ko veüt vemik in Volapük; ab atos ya binon ced bäldana, kel dredöfom ad gebädön eli *glosbe.com*.

Sevob nosi dö fütür. Ba mens okösömons ad nüpladön ini breins okas lektinaparatis smalik, sekü kelos osevons pükis valik, keninükamü Volapük yela alik dabina onik, e methods votik studa no ozesüdons. Too cedob, das nu penäds mödapadalunik anik nog digädons nitedäli. Klu vipom alane ventüris stunidabik pö täv ini Volapükän ma kaeds vönädik fomü lebuk redakan:

Даниил Морозов

II:14:2021

## VOLAPÜKANES DÖ DATIF.

Dil telid. *Fa hiel Daniil Morozov: vicifal.*

**1.1. Getan.  
Pö värb.**

- *dütedön*. Sams: „**Vödastabe** ot **dütedoy vödi**: ‚sunu’ <...> e vödi: ‚savitri’: sol (‘generator’) <...>”; „*Pedütedom midunanes*” (‚Marcus’: XV, 28); „*Pedütedom bevü midunans*” (‚Lucas’: XXII, 37); „*If demoy te sinifi vödas, aniks subsats, ladyeks e pönops, kels seimiko u bosilo notodons fomälodi numa, kanonsöv padütedön numavödes nefümik*” (el „Gramat Volapüka”, bagaf: 69).
- *dütön* (eke bos; sam: **dütön oke** kläno moni), *midütön* (**oke** dili mona, bos; suäma).
- *lütütükön* (eke bos). Sam: *ma mafäd lekreda, keli God elüdütkom one* (elanes di ‚Roma’: XII, 3).
- *gaenön*. Sam: **gaenön Volapüke** limanis nulik.
- *gebidükön* (eke bos). Sams: „**gebidükobs** gasedi **Volapükanes**”; „**ägebidükom ome** bukem”.
- *geridön*, *gerükön* (eke bos), *gerükotön* (eke bos; sam: **Ägerükotof** dili spada okik in Volapük e gasedis ömik se yels balid Vpa cifale telid).
- *givön*, *gividön*, *degivön*, *gegivön*, *gevön*, *legivön*, *lügivön*, *nügivön*, *lovegivön*, *lovegevön*, *seagivön* (eke bos), *givulön* (sam: **ogivulob ole** vilöfo dämi), *givulidön* (eke bos), *kegivön* (eke bos; sam: **äkegivom ome** komandapenädi lü ‚Lyon’), *givülön* (eke bos; sam: *pösod bal, keke* kadämans votik **givülons** nämäti semik).
- *gönädön*. Sam: *Cal potacifa äbinon goldinameinäd veratik pro utan, keke cal at pigönädön*.
- *kalükön* (eke bos). Sams: *No kalükolös omes sinodi at!* (duns paostolanas: VII, 70); *atos pekalükon ome as gid* (elanes di ‚Roma’: IV, 3).
- *komitön* (eke bos).

## II:15:2021

- *kospolön* (sam: *luvien* **äkospolon omes** *flumi benosmela*), *lovepolön* (eke bosì).
- *kredidön, mikredidön* (eke bosì).
- *kulön*. Sam: *mans bofik at äsvo* **äkuloms Vpe** *dönu vegi se xil ini vol lölik*.
- *lärnükön* (eki seimane). Sam: *As pulil degtelyelik* **pälärnükom jukele**.
- *läükön* (bose, lä bos). Sams: „**eläükobs lä nüm** *lätik tiädabledi pro utans, kels vipons ad kipedön timapenädi*”; „**oläükon lä xamavobod** *oka i vödemi rigädik*”; „**Völadeke** *bisarik et äläükom dispenädi*”. Datif äkomädon pö värb at te balna, bo sekü cänid värba loveädik voik ko ut loveädik demodik sümik: *lüükön*.
- *lүүükön* (bose seimosi). Värb at i pagebon as ut metaforik saga. Sam: *Cedü ob ba komandabos, ad lүүükön pönopes löpik nog pönopi bal...* (el „Gramat Volapüka”, noet: 8).
- *ledutükön*. Sam: *edadeidom in Kanaän netis vel, ed* **eledutükom länis onsik ones** (duns paostolanas: II, 19).
- *lenükön*. Sam: **älenükoms ome** *mänedi leredik* („Matthaeus’: XXVII, 28).
- *lofön, lülofön* (eke bosì).
- *loveädön* (yegode, ad yegod). Sams: „värb loveädik **loveädon vobedi** *oka ad yegod*” (vödabuk gretik), „Yegods binons gramatiko dins, **keles** värb kanon **loveädön vobedi** *oka*” (el „Gramat Volapüka”, bagaf: 210).
- *loveükön* (eke bosì).
- *lücödetön*. Sam: *lücödetoy ele* **träitolöd kemenis ola! soäsä vilol, das träitons oli** < völadi gretikün.
- *lüfänön*. Sam: **älüfänofs ome** *me fäns binü pafaplüms koldüli*.
- *lückonfidön* (eke bosì).
- *nüpedön*. Sam: *So түv bakteras ai nulikas as malädikodians* **enüpedon** *dü lunüp stäpedoti okik kanseravestige sperimäntik*.

## II:16:2021

- *nüskutön* (eke bosì).
- *pelön, fipelön* (eke bosì).
- *posbinükön* (eke bosì).
- *potön* (eke bosì).
- *prididön*. Sam: *no oprididol lani obik disvole* (duns paostolanas: II, 27). In diatek nulik datif pö värb at labon difüli siämik topa.
- *prodön* (eke bosì).
- *prünön* (eke bosì).
- *ramenön* (eke bosì).
- *remön* (eke bosì).
- *retükön* (eke bosì). Sam: *Eretükob obe manis velmil* (elanes di ‚Roma’: XI, 4).
- *rogön*. Sam: *nämädans ömik ärogoms okes kultì*.
- *sedön, lüsedön, nüsedön* (eke bosì).

Fövot ofovon.

### **SLUD KADÄMA.**

Redak eglömon ad mäniotön vödi nog bali, kel sis äyel labon leigätodi Volapükik fa kadäm pezepöli, sevabo:

**slitalienet** (*subsat*) = Lin. ‚schizophrenia’, Deut. ‚Schizophrenie, Spaltungsirresein’, ma ‚Interlingua’: ‚schizophrenia’, speranto: ‚skizofrenio’.

Malädanem at baiädon ko vönaoloveikods Volapüka, bi balido subsats somik votik ko lim balid stadi lienetik fümüköl komädons (sams: *brietalienet*, *vutalienet*, *gretamalienet*, *pöjutalienet*), telido stamäd: slit < baiädon ma tümolog ko lim Grikänapükik bal vödeda lanavik bevünetik, äsä vöd: *lekredaslit* (sevabo: ‚schisma’ ü ‚σχίσμα’) jonülön. Fikulos ad jonön patöfis cifik lanamaläda at, kludo gebäd leigätoda tefü stamäd Vöna-Grikänapükik ejinon zesüdön. Fövots ad vöda buk gretik paredaköls fa el Hermann Philipps ya ninädons nulavödi Volapükik löpik.

II:17:2021

## **DOG ELAS ,BASKERVILLES’.**

*Fa hiel ,Arthur Conan Doyle’. Petradutöl fa hiel ,Oleg Temerov’.*

*Tradutod papübon bai koräkots pülik fa hiel ,Daniil Morozov’.*

### **KAPIT KILID. SÄKÄD.**

Koefob, das vöds at ekoedons dremälön obi. Dremäl, kel äketonon pö vög dokana, äjonon, das om it päfäkädükom fa utos, kelosi ikonon obes. Hiel ,Holmes’ äbiegom föfio ön fäkäd okik, e logs omik älabons nidüli dudranik ä sigiki, kel süikon pö ons, ven muvemo enitedälikom.

„Elelogol-li atosi?”

„Leigoäsä kleiliko anu lelogob oli.”

„Ed esagol-li nosi?”

„Ga ön mod kinik atos äbinonöv-li frutik?”

„Kikodo nek pläamü ol älogon-li atosi?”

„Nüpedots ätopons de koap fagotü louns zao teldegs, e nek älüälükon küpäli ad ons. No üküpoböv-la etis üf no äsevoböv konädi at.”

„Galedanadogs mödik komons-li pö maräd?”

„Nendoto si! ab at no äbinon galedanadog.”

„Elesagol-li, das nüpedots äbinons gretotiks?”

„Lemu gretotiks.”

„Ab no äzugons-li lü koap?”

„Nö!”

„Neit ettimik liosotik äbinon-li?”

„Luimöfik e koldik.”

„Ab jenöfo no äreinos-li?”

„Nö!”

„Lael et kinik binon-li?”

## II:18:2021

„Labon pö flans okik buidis tel binü taxuds bäldik: labü geilot mö pïeds degtel e nedudränoviks. Spataveg zänodo labon vidoti mö pïeds zao jöls.”

„Bos binon-li vü buids e spataveg?”

„Si! us strip yeba labü vidot mö pïeds zao 6 binons len flans bofik.”

„Äsä suemob, kanoy-li dudränön buidi taxudik pö top te balik: yan?”

„Si! medü kläpedil äl mar.”

„Lebrekod anik votik komädon-li us?”

„Nö!”

„So, ad rivön laeli taxudik, nedoy-li u doniogolön dese dom u nügolön da yan äl mar?”

„I segolöp dabïnon da priel pö finot fagikum laela.”

„Siör: ‚Charles’ erivom-li osi?”

„Nö! äseatom de us fagotü louns zao luldegß.”

„Täno sagolös obe, o dokan: ‚Mortimer’! — ed atos binon veütik: nüpedots, kelis älogol, äbinons-li su gronaveg efe no su glunot?”

„Nüpedots no kanons jonodön okis su yeb.”

„Äkomädons-li pö flan ot vega leigoäs mara-yan?”

„Si! äkomädons lä siem vega pö flan ot leigoäs marayan.”

„Enitedälükol obi levemo. Dinäd votik: kläpedil äbinon-li färmik?”

„Pefärmüköl e pelököl.”

„Liogeilik et binon-li?”

„Geilotü pïeds zao fols.”

„Täno kanoy-li lovegrämön oni?” — „Si!”

*Fövot ofovon ün mäzul.*

II:19:2021

## PLIN SMALIK.

### Kapit: 9.

Niludob, das efrutidom tävabödis ad mofugön. Ün göd detäva ileodükom sta= böfo valikosi põ planet oka. Kälöfiküno äklinükom nino volkanis jäfidik. Ädalabom volkanis jäfidik tel. Su ons äbi= nos vemo kovenik gödo ad vamükön janedazibis. Id äda= labom volkani no jäfidöli. Ab, äsä suvo äsagom: „Neai se= voy, kis okanon-la jenön!” Kludo id äklinükom nino leigo volkani no jäfidöli. Ven vol= kans vagio peklinükons legu=



diko, koedons pubön filami nevemik e nomöfiki, nen lerups. Lerups volkanik sümons ad spags sejutedöl cima. Klülos, das su tal obsik obs binobs tu smaliks ad klinükön nino volkanis obsik. Sekü atos blinädons obes neplitis lemödik.

Plin smalik boso glumaladälik id isäplanom sprotianis lätik elas ,baobabs’. Äbüocedom, das neföro ögekömom. Ye vobods kösömik valik at ün göd et ijinons lü om binön vemo plitiks. E po= sä lätiknaedo ibegifülom flori ed ebo ävilom pladön oni dis klo= käd, äsenälom desiri ad drenön.

„Adyö!” äsagom flore.

Ab flor no ägespikon ome.

„Adyö!” ädönuom.

Flor äkögon anna. Ab kod atosa no äbinon koldät.

„Äbitob stupiko”, fino ägespikon ome. „Begob ole säkusadi. Osteifülölös ad läbön!”

## II:20:2021



Ästunikom, das rip= rods ifabinons. Ästifikom sekü kofud, äkipölo klo= kädi, keli ilöpiotovom in lut. No äsueomom, vio za= däl takedik at isüikon.

„Vüö! si! lelöfob oli”, flor äsagon ome. „No äsevol osi kodü döbot obik. Ye atos leno binon veütik. Zuo ol it äbitol stupiko, leigoäsä ob. Osteifülolös ad läbön!... Leadolöd blibön seimöpo klokädi at! No plu neodob oni.”

„Ab vien...”

„Koldät oba no binon so vemik... Neitalut flifik ofruton obi. Ga binob flor.”

„Ab nims...”

„Mutob sufälön jönulis tel u kilis su ob, if vilob kolkömön pabis. Jinons binön vemo jöniks. Voto kin ovisiton-li obi? Ga obi= nol fago. Tefü nims gretik: dredob nosi. Labob kralis lönik obik.”

E balugäliko äjonon spinis fol oka. Poso äläükon:

„No bleibolöd so zogön! Atos vemo böladon obi. Ga esludol ad motävön. Kludo motävolöd!...”

Ibä no ävilon, das öloegom drenön oni. Kiopleidik flor et äbinon!

*Fövot ofovon.*

---

## **EL HENRI CARTIER-BRESSON DÖ FOTOGRAF.**

Fotografot binon pänav, skulturav, ritmut e dabum, fomü dils nemödikün sekuna pepladöls.

Fotografölo, äsvo pänoy pänoti, ab ünü sekun bal.